

ODGOVOR

MARIO VUKASOVIĆ
ZASTUPNIK U SKUPŠTINI KANTONA SARAJEVO
PARLAMENTARNA GRUPA „ODGOVOR“

VLADA KANTONA SARAJEVO
MINISTARSTVO OBRAZOVANJA, NAUKE I MLADIH KS
SKUPŠTINA KANTONA SARAJEVO
n/r Ana Babić, predsjedavajuća

Sarajevo, 24.07.2017.

PREDMET : Amandmani na Prijedlog zakona o visokom obrazovanju Kantona Sarajevo

Poštovani,

U prilogu ovog dopisa Vam dostavljam amandmane na Prijedlog Zakona o visokom obrazovanju KS.

S poštovanjem,

Mario Vukasović

AMANDMAN 1

U Članu 132. stav (5) iza riječi „bira se“ dodaje se tekst „iz reda članova akademskog osoblja“

Član 132, stav (5) glasi:

Rukovodilac visokoškolske ustanove bira se **iz reda članova akademskog osoblja** većinom glasova od ukupnog broja članova senata sa pravom glasa i to tajnim glasanjem na način i pod uslovima koji se preciznije utvrđuju statutom.

Obrazloženje:

Ovom dopunom se postavlja minimalni uslov za izbor rukovodioca visokoobrazovne ustanove, jer je predloženim rješenjem Zakon ostavio ovo pitanje u potpunosti neuređeno, što nije u skladu s ostalim odredbama Zakona. Ukoliko bi se ostavilo predloženo rješenje, rukovodioc visokoobrazovne ustanove bi mogao biti bilo ko, bez obzira na akademsko zvanje, jer nije postavljen minimalni okvir u kojem se visokoobrazovne ustanove moraju kretati pri izboru rukovodioca. To je potpuno nelogično s obzirom na odgovornost koju ovo lice ima pred zakonom, jer odgovora za zakonitost poslovanja visokoobrazovne ustanove. Nedostatak minimalnog okvira tj. uslova u zakonu je nelogičan i u kontekstu detaljnog definiranja uslova za rukovodioca organizacione jedinice na visokoobrazovnim ustanovama.

AMANDMAN 2

U Članu 132. dodaje se novi stav (15) koji glasi:

Lice izabrano i imenovano za rukovodioca visokoobrazovne ustanove je za vrijeme obavljanja dužnosti obavezno zasnovati radni odnos sa punim radnim vremenom za obavljanje dužnosti rukovodioca visokoobrazovne ustanove.

Obrazloženje:

Zakon zahtijeva od rukovodioca visokoobrazovne ustanove da zasnuje radni odnos s punim radnim vremenom jednako zahtjevu da rukovodioci organizacionih jedinica zasnuju radni odnos s punim radnim vremenom.

Rukovodilac organizacione jedinice koji odgovara za finansijsko poslovanje i legalitet ukupnog poslovanja na visokoobrazovnoj instituciji treba biti u radnom odnosu s punim radnim vremenom u visokoobrazovnoj ustanovi.

AMANDMAN 3.

U Članu 135 stav (d) dodaje se riječ 'punom' i glasi:

„akademsko osoblje koje je u **punom** radnom odnosu (...)“

Obrazloženje: Predloženo zakonsko rješenje omogućava da neko bude u radnom odnosu prijavljen na jedan sat sedmično u visokoobrazovnoj ustanovi i da bude ravnopravan član vijeća kao i neko ko je posvećen akademiji i akademskom poslu u punom radnom vremenu.

AMANDMAN 4

U Članu 117, na kraju stava (4), briše se tačka, dodaje se zarez i nastavak stava koji glasi „ (...), **ukoliko se ista odnosi na rad u drugoj organizacionoj jedinici iste visokoškolske ustanove.**“

Ukoliko su ispunjeni zakonski uslovi za angažman u skladu sa ovim zakonom, rukovodilac visokoškolske ustanove/organizacione jedinice obavezan je kroz donošenje posebne odluke članu akademskog osoblja izdati saglasnost za angažman ukoliko se ista odnosi na rad u drugoj organizacionoj jedinici iste visokoškolske ustanove.

Obrazloženje:

Predloženo rješenje potpuno je nelogično jer je propisano da se akademsko osoblje mora ustupiti konkurentskoj visokoobrazovnoj ustanovi. Ta odredba je u suprotnosti s odredbama Zakona o radu koji nalaže da poslodavac ima pravo zabraniti takmičenje svojih uposlenika s poslodavcem. Ovim se lični interes uposlenika stavlja iznad interesa visokoobrazovne ustanove, studenata i društva.

Također, za društvo je mnogo korisnije da se raspoloživo vrijeme akademskog osoblja usmjerava u aktivnosti na visokoobrazovnoj ustanovi na kojoj je u radnom odnosu, te samim tim Zakon treba da promovira istraživački rad i ostale aktivnosti koje nastavno osoblje treba da poduzima na ustanovi na kojoj radi. Također, zakon treba da motivira sve visokoobrazovne ustanove da razvijaju vlastite kadrove. Amandman sprječava 'rentanje' kadra i promovira investicije u vlastiti kadar koji je dostupan studentima i koji radi u interesu ustanove u kojoj je nastavnik dobio akademsko zvanje.

AMANDMAN 5

Članu 98. Uslovi za izbor u zvanje, mijenja se i glasi:

Minimalni uslovi za izbor akademskog osoblja u naučnonastavna zvanja na visokoškolskoj ustanovi su:

- **asistent: odgovarajući univerzitetski stepen sa najmanje 240 ECTS bodova i najnižom prosječnom ocjenom 8 ili 3,5;**
- **viši asistent: stepen drugog ciklusa (magisterij);**
- **lektor: stepen drugog ciklusa (magisterij);**
- **docent: naučni stepen doktora u datoj oblasti, najmanje tri naučna rada objavljena u priznatim publikacijama, pokazane nastavničke sposobnosti;**

- vanredni profesor: proveden najmanje jedan izborni period u zvanju docenta, te najmanje pet naučnih radova objavljenih u priznatim publikacijama, objavljena knjiga i originalni stručni uspjeh kao što je projekat, patent ili originalni metod, sve nakon izbora u zvanje docenta, mentorstvo kandidata za stepen drugog ciklusa;

- redovni profesor: proveden najmanje jedan izborni period u zvanju vanrednog profesora, najmanje dvije objavljene knjige, najmanje osam naučnih radova objavljenih u priznatim publikacijama, sve nakon sticanja zvanja vanrednog profesora, te uspješno mentorstvo kandidata za stepen drugog i trećeg ciklusa.

Obrazloženje:

Trenutni uslovi su povećani i nisu u skladu s Okvirnim zakonom o visokom obrazovanju, pa se amandmanom uslovi vraćaju na Okvirni Zakon. Predloženo rješenje negativno diskriminira sve one koji zvanja nisu stekli do sada, u odnosu na one koji su zvanja sticali po prethodnim uslovima, pa je ovaj amandman stoga antidiskriminatoran.

AMANDMAN 6

U Članu 13, dodaju se 3 nova stava iza stava (14), koji glase:

(15) Dislocirana odjeljenja su dužna ispunjavati sve uslove postavljene za visokoobrazovne ustanove osnovane u Kantonu Sarajevo i naučno-nastavno djelovanje u okviru Kantona Sarajevo mora predstavljati neovisnu cjelinu u odnosu na njihovo poslovanje izvan Kantona Sarajevo.

(16) Naučno-nastavne aktivnosti koje obavljaju u Kantonu Sarajevo mogu obavljati isključivo sa studentima koji su registrovani u Kantonu Sarajevo, pri čemu cjelokupni nastavni proces studenti moraju sticati isključivo u Kantonu Sarajevo.

(17) Dislocirana odjeljenja se uvode u Registar i podliježu svim odredbama ovog zakona kao i druge visokoobrazovne ustanove u KS.

Obrazloženje:

U zakonu izostaje regulacija dislociranih odjeljenja.

Član 9(i) spominje troškove postupka za osnivanje dislociranih odjeljenja, a Član 13 (13) navodi da se odredbe zakona koje se odnose na troškove i statusne promjene odnose i na dislocirana odjeljenja. Ovo nije dovoljan preduslov da se u KS ne otvaraju samo filijale visokoobrazovnih ustanova osnovanih izvan KS.

Kako bi se spriječilo da isturena odjeljenja postanu samo stanice za djelimični nastavni proces čime bi se omogućilo da se izbjegne regulacija nad procesom nastave na dislociranim odjeljenjima potrebno je osigurati da dislocirana odjeljenja zaista postaju ustanove u Kantonu Sarajevo u kojima se cjelokupni naučno-nastavni proces odvija na tom mjestu i koji je podložan u cijelosti nadzoru relevantnih tijela koja osiguravaju sprovedbu zakona, ispunjenost standarda i normativa u oblasti

visokog obrazovanja u Kantonu Sarajevo. Amandman osigurava da se studenti registruju u mjestu gdje je visokoobrazovna institucija registrovana i studijom na daljinu stiču svoje diplome, a nadležne inspekcije i ministarstva su onda isključivo u mjestima njihove registracije tj. Kantona u kojem su registrovana, ili države u kojima su registrovani. Ovim se izbjegava manipulacija nastavnim procesom i osnivanje fiktivnih univerziteta i njihovih ispostava.

Zastupnik u Skupštini KS

Mario Vukasović